

Vita ed acziun en la Rezia veterana

Cun sentupadas en il center 2014

■ **(anr/gc) La radunanza annuala da la Rezia veterana – che cumpiglia ils anteriurs da la Corporaziun academica Rezia a Friburg – ha lieu tradiziunalmain la primavaira.** Ils davos onns è quasi succedì a Cuira e mingamai vegnì introductì cun ina visita guidata. Quest onn ha l'architect *Daniel Walser* declerà en ina tura tras la chapitala grischuna il svilup architectonic da quella dals ultims decennis.

Da diversas occurrenz

La radunanza – sut l'egida da la zunt engaschada presidenta *Barbla Etter* – è sa splegada venderdi en la «Staila» a Cuira en preschientscha da prest dus tozzels fidaivels Rezians e Rezianas.

En sia retrospectiva constatescha la parsura ch'il 5avel di da famiglia, il matg a Ragaz-Bogn, saja stà interessant e bain frequentà. – Tar l'usità peleginadi si Ziteil ha l'avat da Mustér, msgr. *Vigeli Monn*, celebrà la s. messa e tegnì il predi. Sper Rezianas e Rezians avevi era divers pelegrins or da la Germania e da l'Austria. Trais Rezianas han procurà per l'accumpagnament musical tar il servetsch divin e *Filip Dosch* è stà responsabel per l'organisaziun.

Paucs commembers da la Rezia han prendì part da la festa centrala da la SSS/StV l'onn passà a Sarnen. – Tar la festa dal vin a Fläsch èsi stà insaquants. La canorta per la fin da l'onn a Cuira è stada frequentada fitg bain. Questa veglia tradiziun duai vegnir revitalisada.

Memento

La Rezia ha stuì prender cumià 2014 da trais commembers defuncts: Peter Schmid, Glion; Gion Battista Spescha, Danis e Gudrun Cavigelli-Schwiter, Domat. Ins è sa regurdà dad els cun in memento.

Novs commembers

La Rezia veterana ha pudì recepir dus novs commembers che han terminà lur studis: *Flavia Birchler*, Sviz, e *Dario Giovanoli*, Cuira. Lez è gist vegnì elegì supstant en il post, restà vacant in onn. Deplorablmain ha la Rezia activa a Friburg be paucs commembers – che s'engaschan dentant fitg. L'interess da sa liar en ina uniun studentica saja oz pitschen. Ins veglia esser liber. – L'archiv da la Rezia, en in tschaler dal restaurant da la canorta a Friburg, vegn da preschent in-

ventarisà ed alura deponì tar in commember.

Bunas finanzas

La cassiera, *Gianna Halter*, preschenta in quint cun entradas da 4500 francs ed expensas en l'import da 4700 francs, uschia ch'i dat ina sperdita da ca. 200 francs. La facultad resta dentant cun 16 000 francs considerabla. Per quest onn quintan ins cun in pitschen avanzament.

Dumonda da commemoranza

Ina dumonda che fatschenta adina puspè la Rezia è: Tge far cun quels commembers ch'èn sortids da la SSR/StV e vulesan tuttina restar en l'uniun? En quella chausa n'è anc nagut decidì.

Program 2015

Era per quest onn datti las occurrenz tradiziunalas: Di da famiglia a Langnau/Albis; peleginadi si Ziteil, festa centrala a Soloturn, quella dal vin en il Signuradi e la canorta per la fin da l'onn a Cuira.

Suenter la radunanza, ch'è mingamai in impurtant eveniment, han Rezianas e Rezians laschà gustar la buna tschaina ed èn stads en buna ed amicabile cumpagnia.